

खबरां

- राज्यसभा नै पेपर लीक करने आहलें लेई कन्नू गी होर सख्त बनाने लेई पब्लिक एग्जामिनेशन संशोधित बिल-2026 पर चर्चा कीती।
- लोकसभा च बक्ख-बक्ख मुद्दे गी लेइयै विपक्ष दे हंगामे कारण सदन दी कार्रवाई च विघ्न पेआ।
- सुप्रीम कोर्ट नै केंद्र गी दिल्ली च विद्यार्थिएं दे बरोध-प्रदर्शन दुरान इस्तेमाल कीते गेदे आर.ए.एफ दे एम्युनिशन लाग गी सुरक्षित रखने लेई आखेआ।
- बिहार, गुजरात ते मध्य प्रदेश च त्रै विधानसभा सीटें पर उपचुनांस लेई मतदान होआ।
- महाराष्ट्र, तेलंगाना, विदर्भ ते पच्छिमी मध्य प्रदेश च भारी बरखा दा रेड अलर्ट जारी।
- ते भारती पुरुष टीम कनाडा च स्क्वैश जूनियर टीम चैंपियनशिप दे सेमीफाइनल च पुज्जी गई।

<><><><><><><>

RS-Paper Leak Bill

राज्यसभा नै पब्लिक एग्जामिनेशन संशोधन बिल 2026 विचार ते पास करने लेई लेई लैता ऐ। जिल्लै सदन बड्डने 11 बजे शुरू होआ तां अध्यक्ष सी.पी राधाकृष्णन होरें जीरो हावर दी कार्रवाई शुरू कीती। उनें आखेआ जे उनें पब्लिक एग्जामिनेशन (प्रिवेंशन आफ अनफेयर मीन्स) संशोधन बिल-2026 गी विचार ते पास करने लेई डा. जितेंद्र सिंह हुंदे आसेआ मिले दे नोटिस गी स्वीकार करी लैता ऐ। बिल दी कापी सदस्यें गी भेजी दिती गई ऐ तां जे ओह संशोधन बिल पेश करी सकन। एह बिल कल लोकसभा च पास होई गेआ हा। नमा कन्नू परीक्षा कन्नै जुड़ी दी गड़बड़िये ज्नेह सौआल पेपर लीक कुसै होर दी थाहर कुसै होर गी आहनना ते संगठित धोखाधड़ी गी रोकने लेई कन्नूी ढांचे गी होर मजबूत करोग। कन्नै गै मामलें दी तेजी कन्नै जांच, तेजी कन्नै ट्रायल ते समें पर निपटारा बी यकीनी बनाग। बिल दा मकसद सरकारी म्तेहयानें दी ईमानदारी, निष्पक्षता ते पारदर्शिता बनाए रखना ते योग्य ते काबिल मेदवारें दे हितें दी हिफाजत करना ऐ।

<><><><><><><>

नीट म्तेहान दे मुद्दे पर विद्यार्थिं दे बरोध-प्रदर्शन दुरान कथित पुलस कार्रवाई पर विपक्ष दे हंगामे दे बादलोकसभा दी कार्रवाई दिन भर लेई स्थगित करी दिती गई। जिललै सदन दी कार्रवाई बड्डलै 11 बजे शुरू होई तां स्पीकर ओम बिरला होरें ग्लासगो च 23में राश्ट्रमंडल खेड्डें च मर्दे दी 100 मीटर द्रौड़ च गोलख मेडल जितने पर पैरा एथलीट दिलीप गावित ते चांदी दा मेडल जिततने पर मोहम्मद बासिल गी बधाई दिती। मगरा जिल्लै स्पीकर होरें प्रश्नकाल शुरू करने दी कोश्ट कीती तां विपक्षी सदस्यें विद्यार्थिं दे बरोध-प्रदर्शन दुरान कथित तौरा पर पुलस कार्रवाई पर नारे लाना शुरू करी दिता। विपक्षी सांसद इस मुद्दे पर केंद्री गृह मंत्री अमित शाह हुंदे बयान दी मंग करा करदे हे। बिरला होरें आखेआ जे प्रश्नकाल सदस्यें दा हुंदा ऐ ते एह सब्बनैं थमां जरूरी कम्म ऐ। स्पीकर होरें आखेआ जे उनें सदन च ते सदन दे लीडरें दी मीटिंग दुरान सबनैं सांसदें थमां अपील कीती ही जे ओह प्रश्नकाल दुरान सदन दी कार्रवाई च विघ्न नेई पान। बिरला होरें आखेआ जे सदन दी कार्रवाई च विघ्न पाना संसदीय परम्पराएं दे मताबक नेई ऐ।

<><><><><><><><>

PM Nasha Mukt

प्रधानमंत्री नरेंद्र मोदी होर इस ऐतवारें नशामुक्त भारत ते विकसित भारत 2047 दे विजन गी साकार करने आस्तै नशामुक्त युवा विकसित भारत संकल्प अभियान दी शुरूआत करडन। राज्यसभा च प्रश्नकाल दुरान पूरक सोआलै दा परता दिंदे होई केंद्री युवा कार्यक्रम मंत्री डा. मनसुख मांडविया होरें आखेआ जे मुख्य गी नशामुक्त बनाने आस्तै सारे आध्यात्मिक संगठन, कालेज, विश्वविद्यालय ते मेरा भारत दे युवा इक मंच पर आवा'रदे न।

<><><><><><><><>

Defence Minister Triveni

रक्षा मंत्री राजनाथ सिंह होरेंत्रोणें सेनाएं दी उनें 9 महिला अधिकारिं गी सम्मानित कीता जिनें समुंद्र प्रदक्षिणा नां दे पैहले ट्राई सर्विस आल वूमेन सर्वकमनेविगेशन सेलिंग एक्सपेडिशन गी सफलतापूर्वक पूरा कीता ऐ। एह अधिकारी भारती सेना दे सेलिंग वेसल त्रिवेणी पर 314 दिन दी जातरा मगरा परतोइयां। नमीं दिल्ली च अधिकारिं कन्नै गल्ल करदे होई सिंह होरें 4 महासागरें च करीब 25 जहार 500 नाटिकल मील दी दूरी तय करने आस्तै टीम गी बदाई दिती। उनें इस अभियान गी नारी शक्ति ते त्रोणें सेनाएं दे आपसी सहयोग दी इक शानदार मिसाल दस्सेआ। सिंह होरें आखेआ जे टीम दी एह उपलब्धि मुख्य दी हर थीs आस्तै प्रेरणा ऐ। उनें भरोसा जाहिर कीता जे उंदी सफलता

युवा महिलाएं गी बड़्डे सुखने दिखने ते राश्ट्र निर्माण च योगदान देने लेई प्रोत्साहित करोग।

<><><><><><>

SC-RAF

सुप्रीम कोर्ट नै अज्ज केंद्र थमां नीट पेपर लीक मामले पर विद्यार्थिं दे बरोध-प्रदर्शन दुरान नमीं दिल्ली च जंतर-मंतर पर तैनात रैपिड एक्शन फोर्स दे एम्युनिरान लाग गी सुरक्षित रखने गी आखेआ। कनून बवस्था दी स्थिति कन्नै निब्वइने लेई मेटैलिक पेलेट गन दे इस्तेमाल पर पूरी चाल्ली नै पाबंदी लाई दिती गेई ऐ। एहदे नै ब्यूरो आफ पुलिस रिसर्च ते डेवलपमेंट दी एडवाइजरी दा जिक्र कीता ते आखेआ जे पुलस गी खास हालात च पेलेट गन इस्तेमाल करने दा अधिकार ऐ। चीफ जस्टिस सूर्यकांत ते जस्टिस जायमाल्या बागची ते वी मोहना हुंदी बेंच नै दिल्ली सरकार गी आखेआ जे बरोध-प्रदर्शन दुरान लोकें गी सब्बनं थमां खरा ईलाज दी सुविधा दिती जा। बेंच नै केंद्र थमां जेदी अगुवाई सालिसीटर जनरलतुषार मेहता करा'रदे हे, आखेआ जे बरोध प्रदर्शन दुरान जंतर-मंतर पर तैनात रैपिड एक्शन फोर्स दे एम्युनिशन लाग गी सांभियै रखेआ जा।

<><><><><><>

Bihar-Guj. By-Ellection

बिहार, गुजरात ते मध्य प्रदेश च इक-इक सीट पर विधानसभा उपचुनांs लेई मतदान सम्पन्न होआ। बिहार च बांकीपुर सीट गुजरात च मंजलपुर सीट ते मध्य प्रदेश च दतिया सीट लेइ मतदान होआ। मतदान संझा 6 बजे तगर चलेआ। शामी 5 बजे तगर बांकीपुर च तकरीबन 34 फीसद मंजलपुर च 34 थमां मता ते दतिया च 69 फीसद थमां मती वोटिंग होई।

<><><><><><>

Rice-Dispatch

कश्मीर घाटी लेई माल गइडी आली सेवा गी थहोए दे बड़्डे उछाल तैहत पैहली बारी अम्बाला कैंटोनमेंट जंक्शन थमां इक निजी फर्म नै कश्मीर घाटी च पाम्पोर लेई चौलें दी इक बड़्डी खेप भेजी ऐ। एहदे राहें खिते च अन्नदाने दी बस्थित सप्लाई जकीनी बनी दी ऐ ते कन्नै कारोबारी ढांचे गी बी मजबूती थहोई ऐ। पाम्पोर च नमीं चालू कीती गेदी इस सुविधा च चौलें दी खेप माल गइडी राहें पुज्जने कन्नै मध्य कश्मीर च इनें सेवाएं दे विस्तार दी बत पदरी होई ऐ। एह पैहलकदमी रिवायती तरीकें दे बजाय आधुनिक तकनीकें दे इस्तेमाल राहें निजी ते कारोबारी कारगो समर्थ दा विस्तार करग ते लागत बी घट्ट करने च मदाद करग।

<><><><><><>

NCSC-Notice

नेशनल कमीशन फार अनुसूचित जाति नै पंजाब दे बरनाला च अनुसूचित जाति समुदाय दे सफाई कर्मचारिएं खलाफ कथित पुलिस ज्यादति गी लेइयै पंजाब दे चीफ सैक्रेटरी ते डरैक्टर पुलिस जनरल होरें गी नोटिस जारी कीता ऐ।

<><><><><><>

POJK

पाकिस्तान दे नजैज कब्जे आहले जम्मू-कश्मीर च शांतिपूर्ण प्रदर्शनकारिएं पर पाकिस्तानी सशस्त्र बलें दे जालिमाना हमलें करी पाकिस्तानी सशस्त्र बलें दी गोलीबारी च 40 थमां मते नागरिक मारे गए न ते केई होर घायल होए न। संयुक्त अवामी एक्शन कमेटी दे प्रदर्शनकारी मौजूदा समें च पाकिस्तानी सुरक्षाबलें दी क्रूरता ते लक्षित हत्याएं गी लेइयै रावलकोट दे डी-चाँक पर शांतिपूर्ण प्रदर्शन करा' रदे न। इस दरान पाकिस्तान दे कब्जे आहले जम्मू-कश्मीर च विधान चुनाएं पर हिंसा चुनावी धांधली ते जबरन गायब कीते जाने दा साया मंडरा'रदा ऐ। 27 जुलाई थमां 10 अगस्त बश्कार त्रै चरणें च मतदान होआ'रदा ऐ।

<><><><><><>

IMD-Red Alert

भारती मौसम विभाग नै अज्ज मध्य महाराष्ट्र, तेलंगाना, विदर्भ ते पच्छमी मध्य प्रदेश च मती भारी थमां भारी बरखा बरने दा अंदाजा लांदे होई रेड अलर्ट जारी कीता ऐ। मौसम विभाग नै अगले दो दिनें च अरुणाचल प्रदेश, केरल, माहे ते राजस्थान च गरजना दे कन्नै भारी थमां मती भारी बरखा ते बिजली चमकने जा पौने दी मेद जताई ऐ। तटीय ते दक्खन अंदरूनी कर्नाटक, हिमाचल प्रदेश, कोंकण ते गोवा च कल तगर नेय गै हालात बने रौहने दी मेद ऐ। इस बश्कार पंजाब, उप हिमालचन पच्छिम बंगाल ते सिक्किम च बी भारी थमां मती भारी बरखा बरने दी मेद ऐ। नार्थ ईस्ट इंडिया च मौसम विभाग नै अगले दो थमां त्रै दिनें च भारी बरखा दे कन्नै अंधी-झक्खड़ चलने, तेज ब्हाऽ ते बिजली पौने दा अनुमान लाया ऐ। इस बश्कार राश्ट्री राजधानी च अगले दो थमां त्रै दिनें तगर भारी बरखा होने दी मेद ऐ।

<><><><><><>

Odisha-Floods

ओडिशा दे केई हिस्सें च हाड़ दा कहर जारी ऐ जेदे नै आम जनजीवन प्रभावित होआ'रदा ऐ ते 1 लक्ख 76 जहार थमां मते लोकें गी उत्थुआं सुरक्षित थाहरें पर पजाया जा करदा ऐ। ओडिशा च हाड़ दी स्थिति गंभीर बनी दी ऐ जेदे च 5 जिले बालासोर, भद्रक, जाजपुर, मयूरभंज ते केंदुझार उप्परोतली बारिश करी सबनें थमां मते प्रभावित

होए न। तकरीबन 5 लक्ख 88 जहार लोक प्रभावित होए न ते 1 लक्ख 76 जहार थमां मते लोकें गी सुरक्षित ठकानें पर पजाया गेआ ऐ। राज्य सरकार नै जिला कलेक्टरें गी प्रभावित परौआरें गी तौले मुआवजा पक्का करने लेई त्रै दिनें दे अंदर नुकसान दा पूरा अंदाजा लाने सरबंधी रिपोर्ट जमा करोअने दा हुक्म दिता ऐ। तोआई उपरले इलाकें च लगातार बरखा करी महानदी दा जल स्तर बरोबर बदा करदा ऐ जेदे कन्नै नदी बेसिन दे झिगड़े इलाकें च रौहने आले लोकें च चैंता बदी गई ऐ। अधिकारिणं खबरदार कीता ऐ जेकर बरखा जारी रौहंदी ऐ ते हीराकुंड जलाशय थां पानी दा प्रवाह बददा ऐ तां महानदी च गंभीर हाड़ दी स्थिति बनी सकदी ऐ।

<><><><><><>

Weather

मौसम विभाग नै अज्जै थमां जम्मू-कश्मीर दे बक्ख-बक्ख हिस्सें च नमें सिरेआ भारी बरखा ते गर्ज-चमक कन्नै अंधी तूफान दी पेशनगोई कीती ऐ जेहदे कारण संवेदनशील इलाकें च ल्हास-पस्सियां पौने, चानचक्क हाड़ औने ते बद्दल फट्टने दी शेंका थमां बी इंकार नेई कीता जाई सकदा। जम्मू प्रांते च इस दरान करीब हर इलाके च हल्की सवां दरम्याने दर्जे दी बरखा बरने दे असार दस्से गेदे न। किश जिलें च इस मौसमी हालात दा मता असर दिक्खने गी लब्बी सकदा ऐ जेहदे कारण भारी ते तेज बरखा बरी सकदी ऐ, टकोहदा करियै चिरें रातीं। इस मौसम दा ज्यादा असर अज्ज ते कल यानि 31 जुलाई दरान दिक्खने गी लब्बी सकदा ऐ।

<><><><><><>

Squash

भारती पुरुष टीम कनाडा दे ओंटारियो च स्कवैश जूनियर टीम चैंपियनशिप दे सेमीफाइनल च पुज्जी गई ऐ। 5मीं थाहरें आली भारती पुरुष टीम नै इंग्लैंड गी 2-1 कन्नै हराइयै सेमीफाइनल च थाहर बनाई। ओहदा अगला मुकाबला संयुक्त राष्ट्र कन्नै होग जेड़ा जपान गी हराइयै अखीरी चार च पुज्जी गेआ ऐ।

<><><><><><>